



Oahppoplána- Sámi visuála kultuvra

Sámediggi mearridan lánkaásahussan 23.03.2021, lánkavuodđu: suoidnemánu 17.b 1998 nr 61 lánka vuodđoskuvlla ja joatkkaoahpahusa birra (oahpahuslánka). §6-4 nubbe lađas.

Oahppoplána sámi visuála kultuvra lea ohppiide geat háliidit kreatiivalaččat bargat dujiin ja sámi dáidagiin. Fága galgá áddit ohppiide reaiduid ipmirdit movt duodji ja dáidda ovddida sámi kulturárbbi. Oahppit galget suokkardahtti bargovuogiiguin hukset iežaset hábmenidentitehta. Oahppoplána lea vuodđuduvvon sámi árvvuide, gillii, kultuvrii ja servodateallimii.

Diibmolohku - Sámi visuála kultuvrrafágas lea 140 jahkediimmu Diibmolohku lea addon 60-minuhtasaš ovttadagain.

Oahppoplána Sámi visuála kultuvra

gusto 01.08.21 rajes

Oahppoplána- Sámi visuála kultuvra

Fága birra

Fága relevánsa ja guovddáš árvvut

Sámi visuála kultuvrafága lea dan birra ahte nannet praktihkalaš ja dáiddalaš gelbbolašvuoda, mas lea duodji ja dáidda vuolggasadjin. Sámi visuála kultuvra galgá addit ohppiide ipmárdusa movt duodji ja dáidda ovddida sámi kulturárbbi ja váikkuha sámi perspektiivvaid ovdánahttimis servodagas. Fága galgá addit ohppiide vejolašvuoda bidjat visuála kultuvrra stuorát oktavuodaide, bargadettiin kreatiivvalaččat ja ulbmillaččat áigequovdilis servodathástalusaiguin. Fága ráhkkanahttá ohppiid bargodillái mas leat vuordámušat praktihkalaš, estehtalaš ja visuála gálggaide, gulahallamii, hutkáivuhtii ja ovttasdoaimmii.

Buot fágat galget leat mielde duohtandahkat oahpahusa árvovuodu. Sámi visuála kultuvra lea vuodđuduvvon sámi árvvuide, gillii, kultuvrii ja servodateallimii, ja dat galgá váikkuhit dasa ahte addit ohppiide ipmárdusa das makkár sámi árvovuodđu iešguđetlágan duodjeárbevieruin ja dáiddaalbmanahttimiin lea. Suokkardahtti bargovuogit galget váikkuhit ohppiid kultuvrralaš ja historjjálaš ipmárdussii, dainna lágiin ahte sii huksejit alcceseaset hábmenidentitehta. Árbevirolaš ávnnasgeavaheami ja bargovugiid bokte ohppet sii dahkat ehtalaš ja guoddevaš válljejumiid, mat leat buoremussan lundui ja birrasii. Fága galgá maid ráhkkanahttit ohppiid joatkit oahpuide ja bargo- ja servodateallimii.

Guovddášelemeanttat

Kulturárbu

Guovddášelemeanttas kulturárbi lea sáhka máhtus sámi kultuvrra, duoji ja dáiddaárbevieruid birra. Guovddášelementii gullá maid reflekeret movt duodji ja dáidda speadjalastá servodaga, ja movt dat hábmejit kultuvrra, servodatovdánahttima ja identitehta. Máhttu iešguđet sámi guovlluid dujiid ja dáidagiid birra lea dehálaš jus galgá ovdánahttit iežas hutkkálaš identitehta. Dasa gullá maid váldit vára ja čalmmustahttit báikkálaš árbevieruid go bargá visuála kultuvrrain.

Hutkkálaš proseassat

Guovddášeameanttas hutkkálaš proseassat lea sáhka praktihkalaš hutkanbarggus, mas kreativitehta ja suokkardahtti metodat leat guovddážis. Dasa lassin gullet guovddášelementii vásáhusat mat leat čadnon sámi kulturárbaí ja árbevieruide ja čatnat daid bargguide ja ovdanbuktimiidda. Duodji ja dáiddaalbmanahttin sáhtá boktit beroštumi, leat vuodđun reflekšuvdnii, ovdánahttit gierdevašvuoda ja addit ipmárdusa.

Visuála gulahallan

Guovddášeameanttas visuála gulahallan lea sáhka gálggain ja visuála giela geavaheamis, go gaskkusta ideaid, vásáhusaid, ságaid ja oktavuodaí, geavahettiin iešguđetlágan visuála gulahallanvugiid. Dasa lassin gullá guovddášelementii geavahit visuála váikkuhangaskaomiid dihtomielalaččat ja geahččaladdivugiin, guovtte- ja golmmadimenšuvnnalaš ja digitála albmanahttimiin.

Bargovuogit ja ávnnasgeavaheapmi

Guovddášeameanttas bargovuogit ja ávnnasgeavaheapmi lea sáhka diehtit ja ipmirdit movt sámit árbevirolaččat leat geavahan ávdnasiid ja bargovugiid, ja movt dán máhtu fievrredit viidásit. Dasa gullá maid ahte geahččaladdat ođđa ávdnasiid ja bargovugiid. Dát galgá addit vuoddu dahkat dihtomielalaš guoddevaš válljejumiid duojárin, dáiddárin, geavaheaddjin ja borgárin. Guovddášeameanttas lea maid sáhka geavahit reaidduid dearvvašvuoda, biras ja sihkarvuoda gustojeaddji njuolggadusaid mielde.

Fágaidrasttideaddji fáttát

Álbmotdearvasvuoha ja eallimis birgen

Sámi visuála kultuvrafágas fágaidrasttildeddji fáttás álbmotdearvasvuoha ja eallimis birgen lea sáhka das ahte identitehta ja ipmárdus sámi kultuvras nannejuvvo duddjoma ja visuála hutkkálaš albmanahttima bokte. Hutkkálaš bargguin ja visuála albmanahttimiin ovdánahttet oahppit iežaset málliid movt ovddidit iežaset ideaid, oaiviliid ja dovdduid.

Demokratiija ja mielborgárvuohta

Sámi visuála kultuvrafágas fágaidrasttildeaddji fáttás demokratiija ja mielborgárvuohta lea sáhka ipmirdit movt visuála albmanahttimiiguin sáhtta čalmmustahttet áigeovdilis áššiid servodagas. Fáddái gullá maid gealbu searvat almmolaš digaštallamiidda duoji ja sámi visuála kultuvrra birra.

Guoddevaš ovdáneapmi

Sámi visuála kultuvrafágas fágaidrasttildeaddji fáttás guoddevaš ovdáneapmi lea sáhka das ahte oahppit ožžot ipmárdusa movt sii sáhttet váldit vára resurssain, luonddus ja birrasis go reflekterejit ávnnasgeavaheami ja buvttadanvugiid birra. Dat mearkkaša maiddái reflekteeret ja váldit ehtalaš ja guoddevaš válljejamiid iežas hutkkálaš bargguin. Fáddái gullá maid ipmárdus das ahte duodji ja dáidda lea oassi sámi kultuvrralaš guoddevašvuodas.

Vuodđogálggat

Njálmmálaš gálggat

Njálmmálaš gálggat sámi visuála kultuvrras mearkkaša guldalit ja addit responsa spontána ságastallamiidda ja ságastallamiidda maid lea ráhkkanan. Dat mearkkaša geavahit fágaterminologiija go bargá dujiin ja sámi visuála kulturalbmanahttimiin. Go geavahit fágaterminologiija giela ságastallamiin, ovdanbuktimiin ja ságaskuššamiin, ovdánahttet oahppit njálmmálaš gálggaid válddahit, árvoštallat ja reflekteeret iežas ja earáid bargguid.

Máhttit čállit

Máhttit čállit sámi visuála kultuvrras mearkkaša hábmet teavsttaid mat leat heivehuvvon vuostáiváldái ja ulbmilii. Dat mearkkaša gulahallat teavstta ja symbolaid bokte visuála albmanahttimiin. Dasa gullá maid ahte máhttit dokumenteret bargoproseassaid ja reflekteeret iežaset bargguid ektui ja geavahit gálduid kritihkalaččat luohtehahti vugiin.

Máhttit lohkat

Máhttit lohkat sámi visuála kultuvrras mearkkaša gávdnat ja árvvoštallat eksplisihitta ja implisihitta dieđuid duojs ja eará gálduin. Dat mearkkaša maid buohtastahttit, dulkot ja systematiseret dieđuid iešguđet teavsttain go fágalaš mearrádusaid dahká.

Máhttit rehkenastit

Máhttit rehkenastit sámi visuála kultuvrras mearkkaša ahte máhttet atnit mihttoláva ja sámi árbevirolaš mihtidanvugiid bargguid plánedettiin ja čađahettiin.

Digitála gálggat

Digitála gálggat sámi visuála kultuvrras mearkkaša geavahit digitála resurssaid go duddjo, visualisere, dokumentere ja ovdanbuktá barggu. Digitála galggat lea maid árvvoštallat ja reflekeret iešguđet gálduid, čájehit digitála árvvoštallannávcca, čuovvot dahkkivuoigatvuođa njuolggadusaid ja čujuhit gálduide luohtehahti vugiin.

Gealbomihttomearit ja árvvoštallan

Gealbomihttomearit ja árvvoštallan prográmmafágas sámi visuála kultuvra

Oahpahusa mihttomearri lea ahte oahppi galgá máhttit

- plánet, ovdánahttit, dokumenteret ja árvvoštallat iežas duoji ja dáiddaalbmanahhttimiid gos lea viežžan inspirašuvnna sihke ovddeš ja dálá sámi visuála kultuvrras
- suokkardit ja selvehit báikkálaš sámi visuála árbevieruid ja geavahit daid hutkkálaš proseassain
- selvehit ja reflekeret kritihkalaččat ja ehtalaččat movt sámi visuála kultuvrrain sáhtta fuomášuhttit áigeguovdilis servodatáššiid.

- ságaškuššat ja reflekteeret movt sámi visuála kultuvra váikkuha servodatdigaštallamiidda
- reflekteeret makkár árvu fágaterminologijjas lea ja geavahit fágaterminologija njálmmálaččat ja čálalaččat
- geavahit guovtte- ja golmmadimenšuvnnalaš hámiid komposišuvdnaprinsihpaid go ráhkada sárggastusaid ja bargotevnnegiid mat leat vuodđun iežas hutkkálaš bargguide
- geavahit giehtareaidduid ja digitála reaidduid hutkkálaš proseassain
- geavahit máhtu duoji ja dáiddaalbmanahttiimiid ivdne-, symbola-, ja ávnnasgeavaheami birra iežas hutkkálaš bargguin
- reflekteeret ja presenteret movt kultuvra, árbevierru ja guoddevašvuohta váikkuha sámi visuála kultuvrii
- válljet ja geavahit sámi árbevirolaš bargovugiid ja ávdnasiid
- selvehit ja geavahit árbevirolaš sámi mihtidanvugiid
- geavahit reaidduid dearvašvuođa, biras ja sihkarvuođa njuolggadusaid mielde
- selvehit ja čuovvut njuolggadusaid mat gusket dahkkivoigatvuhtii ja gáldogeavaheapmái

Dađistaga árvvoštallan

Dađistaga árvvoštallan galgá leat mielde ovddideamen oahppama ja ovdánahttit gealbbu sámi visuála kultuvrras. Oahppit čájehit ja ovdánahttet gealbbu sámi visuála kultuvrras iešguđet hutkkálaš proseassaid bokte. Oahppit čájehit ja ovdánahttet gealbbu go geavahit fágagiela, sámi visuála árbevieruid ja guoddevaš ávdnasiid iežaset hutkkálaš bargguin. Oahppit čájehit maid gealbbu go sii geavahit komposišuvdnaprinsihpaid, sárggastusaid, bargotevnnegiid ja reaidduid.

Oahpaheaddji galgá láchit dili ohppiid mielváikkuheapmái ja arvosmahttit oahppanhálu dan bokte ahte oahppit besset suokkardit ja bargat hutkáivuodain. Oahpaheaddji galgá gulahallat ohppiiguin movt sin ovdáneapmi lea leahkit hutkkálaš proseassas, geavahit sámi kulturárbbi inspirašuvdnan ja bargat suokkardahtti ja kreatiiva vugiiguin. Gealbbu vuodul maid oahppit čájehit, galget sii beassat mitalit maid sii iežaset mielas máhttet, ja reflekteeret iežaset fágalaš ovdáneami birra. Oahpaheaddji galgá oaivadiid viidásit oahppama ja heivehit oahpahusa nu ahte oahppit sáhttet geavahit oaivadeami plánet, čađahit, dokumenteret ja árvvoštallat iežaset hutkkálaš bargguid.

Oppalaš árvoštallan

Oppalašárvosátni galgá čájehit oahppi ollislaš gealbbu go oahpahuš loahpahušvuođas sámi visuála kultuvra. Oahpaheaddji galgá plánat ja láhčit dili nu ahte oahppit besset čájehit iežaset gealbbu iešguđet láchkai mat fátmastit ipmárdusa, reflekšuvnna ja kritihkalaš jurddašeami iešguđet oktavuodain. Oahpaheaddji galgá bidjat árvosáni sámi visuála kultuvrras dan gealbbu vuodul maid oahppi lea čájehan go hutká iežas bargguid, dokumentere ja reflektere fágalaš ipmárdusa.

Árvoštallanortnet

Oppalašárvoštallan

Sámi visuála kultuvra: Ohppiin galgá okta árvosátni

Eksámen ohppiide

Sámi visuála kultuvra: Oahppit sáhttet gessot njálmmálaš-praktihkalaš eksámenii. Eksámen ráhkaduvvo ja sensurerejuvvo báikkálaččat. Eksámenis galgá leat ráhkkananoassi.

Eksámen privatisttaide

Sámi visuála kultuvra: Oahppit galget čađahit njálmmálaš-praktihkalaš eksámena. Eksámen ráhkaduvvo ja sensurerejuvvo báikkálaččat. Fylkkasuohkan mearrida galget go privatisttat oažžut ráhkkananoasi eksámenis mii báikkálaččat lea mearriduvvon.